



ШЫН

НИИТИЛЕЛ-ПОЛИТИКТИГ СОЛУН

1925 чылдың
август 31-де
үнүп эгелээн

№ 104 (16562)

2002 чылдың
СЕНТЯБРЬ 10,
ВТОРНИК

Ат салган шагы 22.00
Садар өртээ 3 рубль.

ТР-нин тудуг сайылынга сөс

РЫНОККА ДУУШТУР

1990 чылдарның эгезинден бээр республиканың тудуг ажылы чорбастаан. Социалисттик экономиканың үндезининге туттунуп турган тудугларны чурт хенертен рынок экономиказынче кириптерге кым акшаландырар боор. Тудуп турган тудуглар ара кагдынган, эң-не берге айтырылганың бирээзи тудуг организацияларының төпчүткен баазалары азы, өскээр чугаалаарга, тудуг материалдары-биле хандырып турган бүдүрүлгелер буурап дүшкен, ооң дериг-херекселдерин ол үениң чазый-чилби удуртукчулары садьп-сайгарып, Саян артынче чүдүрүп чорудупкан.



Ам республикада тудуг ажылы чүгээртеп орат. Моон мурнунда чылдарда бир чылда 2-3 объектини мөлдүк-калдык ажылгалла киирип турган болза, сөөлгү ийи чылда ооң саны чүс ажып турар апарган. Чаа тудуглар туттунуп, чоннун негелде хомудалын хандырып эгелээн. Ол, бир дугаарында, 1990 чылдарның эгезинде ара кагдынган чуртталга бажынарны, школалар, садиктер болур. Тудуг ажылында тургустунуп келген байдалды ТР-нин Чазаа өөренип көргөш, ону дүрген шийтпирлээр, боттуг хем-чеглер алып талазы-биле ТР-нин Чазаның чаа составында ТР-нин Тудуг яамызын тургусканы таварылга эвес.

Республикада тудуг ажылын дорту-биле харылап турар, ТР-нин Чазак Даргазының оралакчызының хүлээлгезин күүседип турар ТР-нин тудуг сайыды Евгений Леонидович ОСЕРДЦОВ-биле ужуражып, кыска чугааны кылдым. Тудуг сайыдынга ажылдаарының бетинде Е.Л. Осердцов 2001 чылдан эгелээш, ТР-нин Чазак Даргазының оралакчызы болуп, тудуг талазы-биле харылап турган, тускай эртеми тудуг инженерин, хей чылдарда Кызылдың тудуг организацияларынга ажылдап чоран арга-дуржулгалыг удуртукчу.

— Чугаа-выстың эгезинде, бир дугаарында, республикада тудуг кылып турар организациялар-ла көвүдээн болгай, оларның ажылынга хамаарыштыр чүчү чугаалап болур силер, тудуг объектилеринге кысказы-биле доктаап көрүңерем, Евгений Леонидович?

— Тудуг кылып турар организациялар көвүдээн деп силернин чугаалап ораарыңар шын. Рынок экономиказының тургустунганы-биле кандыг-даа ат-сыптыг организациялар тудугда ажылдап турар. Оларның аразында тудугну кылып чорударының чаа арга-хевирлерин тып, рыноктуң негелдезинге дүүштүр ажылдай берген тудуг организациялары бар. Чижээлээрге, «Сельстрой» кызыгаарлаттыг харысалгалыг эштежилге (С.В. Сафрин), хуу бүдүрүлгө «Зурначян», «Кызылстройсервис» КХЭ (Симчит), «Жилье» КХЭ (В.Г. Гавриленко), «Остов» КХЭ (В.С. Акперов), «Дамырак» (А.Колоян). Оларның деңгелинге чедир чамдык тудуг организациялары багай эвес «шимченип» кел чыдары өөрүнчүг.

Чыл эгезинден тура республиканың тудуг комплекзи 260 млн. рубльдин капитал салышкынын шингээди алган, эрткен чылдың ол үези-биле деңгээрге, өзүлде 28 хуу хей бооп турар. Бо чылдың сес айларында дыка хей тудуг объектилерин ажылгалга кирген. Ниитизи-биле 3,8 муң дөрбелчин метр чуртталга шөлү, Кызыл хоорайда эрги көвүрүтүчү чаартып кылган, ооң-биле чергелештир орукчулар Барыын-Хемчиктин Акта, Таңды-

ның Дүргенде, Каа-Хемнин Мергенде көвүрүтүчүлери ажылгалга киирген, мырыңай чоокта чаа Улуг-Хемнин Арыг-Үзүүнде школаны, «Цагаан-Тологайда» болгаш «Шара-Суурда» каайлының эрттирилге пунктуларын, «Стройдеталь» күрүнениң каттышкан бүдүрүлгезинде мияш болбаазырадыр цехти, өкпези аарыг урулгарга кожуннар аразының интернадын ажылгалга киирген. Ам удавас Кызыл хоорайда Пушкин кудумчунда 24 аал чурттаар чуртталга бажыңы, эмнелгениң профилактика төвүнүң тудуу, хем ол чарында дыңнаары багай урулгарның дузалал школазы, Туран хоорайда №2 школаның немелде тудуу ажылгалга кирер.

Кызылдың №9 школазының чаартылгазы доозулган. Республиканың халдаврылыг аарыглар эмнелгезинин тудуу, Кызыл хоорайда хем ол чарында ортумак школаның, малчыннарның аалчылар бажыңының, күрүне лицейинин болгаш өкпе аарыглар диспансеринин немелде тудуглары кончуг шалыпкын туттунуп турар. Тускай көрдүнгөн инвестиция программасында федералдыг бюджеттин акша-хөреңгизин «Тываның машина тудуушкун заводу» ККБ-нин пластмасс кылыр цегинде, Кызыл хоорайда кондитер фабрикасында, «Тыва даг-дүгү» комбинатында, Тываның күрүне университетинин тудугларында, Дээди болгаш Арбитраж судтарының, Иштики херектер яамызының, Бояровка—Тоора-Хем аразының авторуунун тудугларында багай эвес шингээди ал турар.

— Тудугда кадрлар айтырымы нарын байдалда турар деп чугаа бар, ол талазы-биле чүчү чугаалап болур силер?

— Ол, бир талазында, шын. Хоочун тудугчулар колдуу хүндүлүг дыштанылгаже үнген, олар шупту кайын тудугже эглип кээр деп. Тывага тудуг ажылы турупкан үеде чамдык тудугчулар өскээр ажылдап чоруй барган.

(Уланчызы 2-ги арында).

КОНФЕРЕНЦИЯНЫ ЭРТТИРЕР

Тыва Республиканың Чазаа «Төп Азия регионунун үнүш, дигриг амытаннар болгаш чурттакчы чонунун генофондузунун биологтук хей язылы болгаш ону кадагалаары» деп I бүгү-делегей эртем-практиктиг конференцияны сентябрь 23-25 хүннеринде Кызылга эрттирерин ТР-нин Кадр политиказы, эртем бол-

гаш өөредилге албан черлеринин яамызынга, Тываның күрүне университетинге дааскан доктаалды хүлээп алган. Ол-ла доктаал-биле оргкомитеттин составын болгаш конференцияны эрттиреринин программасын бадылаан.

Бистиң корр.

Төлээлекчилер хуралында КИЖИЛЕРЖЕ САГЫН САЛЫШКЫН

Бай-Тайга кожунунун Төлээлекчилер хуралының ийиги сессиязы болуп эрткен. Амыдыралы чединмес хамаатыларга адреситиг дуза чедиреринин, эмчи ажылдакчыларының ажыл төлевиринин чедишпези-биле кожунун бюджетинге өскерилгелер киирер дугайында болгаш өске-даа айтырылганы аңаа чугаалашкан. Хамаатыларның, ылаңгыя чединмес амыдыралдыгларже кичээңгейни салырының дугайында депутаттар чугаалашкаш, ону экижидеринин талазы-

биле ажыктыг саналдарын, сүмелерин берген.

Тыва Республиканың Улуг Хуралының Хоойлужудулга палатазының депутаты Б.К.Күдерек, Төлээлекчилер палатазының депутаттары Союман Суглай-оол, Петр Сарыглар, Мерген Содунам сессияның ажылынга киришкен.

Сессияга ниитизи-биле он ийи айтырыгны чугаалашкаш, чогуур шийтпирлерни хүлээп алган.

Сарыг-оол САЛЧАК.

МЫНДЫГ ҮНЕДЕЛДИ БЕРДИ

«Шын» солунунун хүндүлүг номчукчулары! Силерге бижип бараалгаар ук ужурум болза, Тыва Республиканың Өөредилге яамызының сайыды Петр Александрович Морозов мээң борастааным «Тыва чаңчыл» деп аттыг ийи номумну онзалап үнеледи. Сайыгтың бижээни бо:

«Бо чылдың тыва класстарга «ТЫВА ЧАҢЧЫЛДЫ» тускай эртем кылдыр өөредир. Ол өөредилге номун чогааткан кижик М.Б.Кенин-Лопсан».

Петр Александрович Морозовтун бо айыткалың 2002 чылдың август 31 — сентябрь 6-да үнген «Слово» солунга парлаан. Оларларның ол чугаазының адын «Нас ожидает интересный год» дээн.

Башкыларга, өөреникчилерге, ада-иелерге, журналистерге, чогаалчыларга, эртемденерге болгаш күрүне дарга-бошкаларынга дуза болзун дээш, ол номнарның тус-тус үнген

үезин айтып берейн.

«Тыва чоннун бурунгу ужураары». Кызыл. «Новости Тувы». 1994 чыл. Тиражы 5000 кезек.

«Тыва чоннун ыдыктыг чаңчылдары». Кызыл. «Новости Тувы». 2000 чыл. Тиражы 1000 кезек. Ол номнарның ниити ады «Тыва чаңчыл».

Эргим номчукчулар! Тыва чаңчыл дээрге бистиң бурунгу өгбелеривистиң чүс-чүс чылдар дургузунда бодарадып арттырган ЫДЫКТЫГ ХООЙЛУЗУ-ДУР. Бистиң чалыы салгал «Тыва чаңчылды» бичизинден тура шингээди алгыр болза, моон сонгаар Тыва чуртунга арагалаар чорук чидер, оорлаар чорук эстир, бижектежир чорук болбас, кара таакпы тыртар чорук тайлыр, мегелээр чорук узуткалыр, чалгаа чорук туман ышкаш арлы бээр!

Монгуш КЕНИН-ЛОПСАН, хоочун этнограф, төөгү эртемнеринин доктору.

ДЫҢНАДЫГ

ТР-нин Чазаның Аппарадының хамаатыларның билдиришкени болгаш чагаа бижиктери-биле ажыл чорудар талазы-биле эргелелин өскээр көшкени-биле холбаштыр хүлээп алышкынын 2002 чылдың сентябрь 11-ден эгелеп дараазында адреске чорудар: Кызыл хоорай, Красноармейская кудумчузу, 100 (Парлалга бажыңы), кабинет №17, хүлээп алышкын хүннери: среда, пятница, 8 шактан 17 шакка чедир ажылдаар.

АЖЫКТЫГ АРГАЛАРНЫ...

• Бай-Тайганың «Кызыл-Даг» бүдүрүлгө каттыжышкынында •

Кызыл-Даг суур эрткен чүс чылдың дөртен чылдарының төнчүзүндө үндөзилетинип тургустунган. 1949 чылда эге школа, эмнелге пунктузу ажыттынган. Бежен чылдарының эгезинде «Тиилелге» колхоз аңаа организастанган. Моон эгелээш аът өртээр өргөн турбаан черге суур болгаш коллективтиг ажыл-агый хөгжээн.

«Тиилелге» колхоз мал ажылын өстүрер талазы-биле дээрелерниң бирээзи турган. Баштайгы тыва херээжен Социалистиг Күш-ажылдың Маадыры Үрүле Канданың болгаш өске-даа орден-хавыяалыг мурнакчыларның моон үнгени оң бадыткалы болур. Ындыг турбуже ажыл-агыйны дүжүргөш, «Тээли» совхозтуң салбыры болдурган чылдар база бар. Ынчан мал, чер, тудуг ажылы орта сайзыраар хамаанчок, сандарай бергенин чон билир.

Кажан ангор өшкү ажылдыг «Кызыл-Даг» совхозту эрткен чүс чылдың сезен чылдарында тургусканы бо черге ажыл-агыйны, амыдырал-чуртталганы сыр өскерткен. Ангор өшкүнү өстүрер талазы-биле республикага дээр көргүзүлгелерлиг ажыл-агыйның бирээзи турган.

Рынок экономиказынче шилчилгениң берге чылдарында чамдык өске черлерде дег совхоз үндөзини-биле буурап дүшпээн, бодунуң материал-техниктиг баазанын колдуунда камгалап арттырган. Ангор өшкү өстүреринче сагыш салбайн барганы хомуданчыг. Амгы үеде «Кызыл-Даг» көдээ ажыл-агый бүдүрүлгө каттыжышкыны болу берген, оң ажыл-чорудулгазы кандыгыл?

БИЧЕ БҮДҮРҮЛГЕЛЕР БЕРИМЧЕЛИГ

Экономиктиг реформаларны боттандыраары — белең эвес айтырыг, ол хей күштү, тывынгыр-сагынгыр, ажыл-агыйы, сайгарлыкчы, чогадыкчы чорукту негээр нарын болгаш харысалгалыг ажыл. Бо ажыл-агыйның экономиказының үндөзини — мал ажылы. Оң баш санын өстүрер, продуктулуун бедидер дээш чыл бүрүде шудургу ажылдап келзе-даа, чарыгдал, карылга көвүдээш туруп берген. Бүдүрүлгениң удуртулгазы, тускай эртемниглери мындыг байдалды канчап өскерттирил, чүнү кылза оон уштунуп болурул деп айтырыгны боттарының мурнунга салганнар. Орта харылар аңга-аңгы турган. Бүгү талалыг шыңгы сайгарыганың соонда мал ажылы-биле чергелештир биче бүдүрүлгелерни хөгжүдери ажыктыг болур деп түннелге келгеннер. Ынчангаш мурнунда турган биче бүдүрүлгелерниң ажылын эде тургузуп экижидеринче, чааларын ажыдарынче сагышты салган.

Чоннун хүн бүрү хереглээри аш-чем аймаан бүдүрерин, оларны садып-сайгарарын, бирги ээл-чегде, кичээнге алган. Пекарняның колбаса цегиниң ажылын чогуур деңгелге тургускаш, магазинге саткаш, оон хүнүн-не акшаны эвээш-биче-даа болза, кирип ап турар болу берген. Ажыл-агый улуг, биче ийи дээрбелиг, кайызынга-даа далганы тыртып, чарбаны кылып турар. Оларның продукциязының шынары багай эвес, аңаа чурттакчы чон хомудавас. Пилораманы тургузуп алганы кончуг ажыктыг болган. Оң дилген материалдарын чүгле сумуда эвес, кожуун девискээринде бүдүрүлгелер, организациялар садып ап турар болу берген. Ыяш дилдирип алыр дээн кижилерге ачудуазын база чедирип келген.

Бүдүрүлгө 40 муң рубльдин чээлизиң алгаш, алгы эттээр цехти ажылткан. Оң ажылын чазаныр, даараныр уран-шевер мастер Тыва Республиканың культуразының алдарлыг ажылдакчызы Сергей Кочаа удуртуп турар. Оң ажылы-биле таныштывыс. Цехте ийи

станок бар, оң бирээзин Сергей Хомушкуевич боду чогааткан. Алгыны шыгыдып идээлээринче улуг кичээнге ийи салган, чүге дээрге оң шынарлыг болуру оон хамааржыр. Ону чедимчелиг боттандыраарына хереглээр шупту химиктиг бүдүмелдери бар.

Эттээр алгыларны хол-биле тудуп, суйбап көөрге, кандыг-даа хөөрем чокка ак торгу дег деп чугаалап болур. Оң эки шынарының бирээзи өлге, шыкка өтпес, катпас. Эттээр алгыларны будуп база турар. Оон тыва тоннарны, чол-дак хөрөктээштерни, чеңи-чоктарны, бопуктарны, хол-хаптарын болгаш өске-даа хептерни даарап турар. Хамаатыларның чагыгларын цех хүлээп алгаш, тоннарны, чеңи-чоктарны машиназынга даараар. Ой дүктүг хой кезинден кылган хүрең будук-биле будаан чеңи-чокту магадап көрдүвүс, шынары эки чорду.

Шынарлыг алгыларны эттеп, оон чараш хептерни даарап турар цехтиң ады-сураа алгаан. Чагытлар кылганнар кайы-даа девискээрлерден келир. Ындыг болганындан эттээр, хөөдүп белеккээр, кургаткан, ээлчээр манаан алгыларның ында хөйүн кижидораан-на эскерип каар.

Бистер аңаа турувуста, хуу ажыл-агыйлыг күш-ажылдың хоочуну Эрес-оол Салчак чедип келди.

— Кончуг дүрген алгылар эттедип алыр дээш келдим. Удавас уруувустуң кудазы болур. Күдээвиске



Алгы эттээр цехтиң удуртукчусу С.Х. Кочаа.



Алгы эттекизи Равил Хертек.

белек кылдыр бээр чеңи-чок даарадып алырым ол дур ийи — деп, ол чугаалады.

— Шаанда тывалар алгы-кеш эттээр талазы-биле мергежилдиг улус болгай, ам уттундуруп барганы ол бе?—деп оон айтырдым.

—Кайын уттундуруп, кылып ап болур. Шынары арай хирелиг боор чүведир. Бо цех амгы үениң технологиязы-биле алгыны эттеп турар, ынчангаш шынарлыг, улустар борта кээр-дир — деп, ол харылады.

Бо цехтиң баазыныга Ак-Довурактың профтехучилищезиниң алгы-кеш эттээр, болбаазырадыр, даараар салбырын ажыткан, ону бо чылын 15 кижидооскан. Салбырның ажылын Сергей Кочаа удуртуп турар. Салбырны дооскан Равил Хертек-биле ужураштывыс, бо мергежилге кончуг хандыкшаан оол болду. Билиг-мергежилдин улам бедидип ханьладыры-биле Красноярскиниң

технологтуг колледжинде кирип алган, өөренип турар болду.

«Кызыл-Даг» бүдүрүлгө каттыжышкынының биче бүдүрүлгелерниң ажылын экижиткени ажыктыг болган, оларның ачызында ажыл-агый сегип, бут кырында туруп келген. Ынчангаш 2001 чылда республиканың дээр ажылдыг он бүдүрүлгезиниң санынга киргеш, 80 муң рубль-биле шаңнаткан. Бо ажыл-херээн ам-даа сайзырадыр дээш бүдүрүлгө ажылдап турар.

Бүдүрүлгө мал ажылынче кичээнге ийи база кошкатпаан. Оң баш санын өстүреринче, продуктулуун бедидеринче, уксаазын экижидеринче доктаамал сагышты сөөлгү үеде салып турар болу берген. Моон түннелинде көргүзүлгелер чыл келген тудум-на, чүгээртеп олар.

Бо чылдың бирги чартында ажыл-агый ниитизи-биле чүс баш төрүүр хой, өшкүге онааштыр 72 баш чаш төлдү менди

дорукуруп алган. Ынчангаш кожуунга, республикага дээр көргүзүлгелерин одуруунга кирген. «Наадым-2002»-ниң байырлалында бүдүрүлгениң эки ажылдаанын демдегледип мактаан.

Малчыннардан Тыва Республиканың алдарлыг малчыны, орден-хавыяалыг Сандыжап Хертек, Сылдыс-оол Сагды, Эрес Успун-оол, Каң-оол Ендан чүс баш төрүүр хойдан-на 99 чедир хураганы менди алгаш, өске өөрүнге үлөгер-чижээр көргүскеннер. Амгы үеде олар кышка белеккелди хынамчалыг чорудуп, мал чемнерин хөйү-биле курлавырлап алыр ажылда хаара туттунган.

Малдан хөй продуктуларны алыры оң уксаазын экижиткенинден улуу-биле хамааржыр. Ону барымдаалааш, уксаалыг малдарны ажыл-агый садып ап эгелээр. Уксаалыг ангор өшкүнү өстүрер, оларны садып-сайгарар талазы-биле «Кызыл-Даг» дээр ажыл-агыйның бирээзи турган, ону катап эгидер сорулга-биле 55 баш анайны, бүдүрүкчүнү садып алган. Көп-Сөөк дээрге өшкү малды өстүреринге кончуг таарымчалыг оран. Ол ышкаш тыва хойларны өстүрери-биле кара баштың ак 10 кошкарны Өвүрнүң «Ак-Бедик» ажыл-агыйындан садып алган.

Малды өстүрери чер ажылы-биле сырый хол-баалыг болганда, мал чемнерин тарырын көвүдеткен, оларны 10 га сугаттыг черде тараан, үнүжү эки, оң шөлүн дараазында чылдарда көвүдедири көрдүнүп турар.

Малчыннарның ажыл-даарына, чурттаарына таарымчалыг байдалдарны тургузарынче база сагышты салган. Чүге дээрге малдың баш санын өстү-



Цехтиң даараан чеңи-чогу.

рер, продуктулуун экижидер берге болгаш харысалгалыг айтырыгны олар шийтирлеп турар болгай. Ынчангаш аш-чем, идик-хеп аймаа, одаар чүүл-биле хандыраар хем-чеглерни доктаамал ап турар.

«Кызыл-Даг» көдээ ажыл-агый бүдүрүлгезиниң ажыл-агыйы шуптузула чедишкенин чоруп турар дээр болза, шынга дүүшпес. Ында четпестер-даа, чедир кылдынмай-даа турар ажылдар бар. Биче бүдүрүлгелерге сагыш салып турар-даа болза, колбаса цеге сөөлгү үеде продукция чогуңдан ажылдавастаан. Мал ажылында четпестерни чок деп болбас.

Көдээ ажыл-агый бүдүрүлгө каттыжышкынының удуртулгазы (директору Николай Монгуш), тускай эртемниглери, ажыл-ишчилери баштайгы чедип алган чедишкенин быжыглаар, четпестерни эдер дээш ажылдап турарлар.

Таан-оол ХЕРТЕК. Автунуң тыртырган чуруктары.



Мурнакчы малчыннар Сандыжап биле Каадыр ХЕРТЕКТЕР (мурнуку одуругда) ажы-төлу-биле кады.

